

遼金京城考

周祥以字持贈

226
229.11
2

遼金京城考

遼金京城考

退翁周肇祥

余嘗撰遼金元明清五朝京城考略。已刊布就正於當世矣。近北京官民有南郊遼金故城調查保存之議。余亦參預其事。已兩次發表所見。茲徇中和月刊及同人之請。用加整理。證以近來心得。復成此篇。蓋北京城池沿革。遼金爲一統系。元則另建大都。明清又爲一統系也。遼金京城。方位基址。旣已瞭然。則南郊故城基爲歷史遺留僅有之古蹟。實具保存之必要矣。

遼太祖以迭剌部之衆。代遼撥氏。起臨潢。建皇都。太宗會同元年。石晉以幽涿檀順營平蔚朔雲應新鵠儒武寰十六州來獻。於是以皇都爲上京。升幽州爲南京。改南京爲東京。聖宗升鎮州爲中京。興宗升雲州爲西京。五京乃備。今之所論則南京也。

南京城本唐幽州之舊。按遼史地理志。方三十六里。崇三丈。衙廣一丈五尺。敵樓戰櫓皆具。凡八門。東曰安東。迎春。南曰開陽。丹鳳。西曰顯西。清晉。北曰通天。拱辰。大內在西南隅。皇城二門。東曰宣和。南曰大內。內門曰宣教。改元和。外三門。曰南端。左掖。右掖。左掖後改萬春。右掖後改千秋。有樓閣球場。皇城西門曰顯西。設而不開。北曰子北。西城嶺有涼殿。太宗本紀。會同四年。於燕京皇城西南築建涼殿。東北隅有燕角樓。坊市牌舍寺觀不勝書。宋王曾上契丹事曰。幽州號燕京。子城就西南羅郭爲之。正南曰啓夏。內有元和殿。東門曰宣和。城中坊閤皆有樓。有稠忠寺。本店太宗爲征遼陣亡將士所造。又有開泰寺。魏王耶律漢寧造。南門外有于越王廟。爲宴樂之所。門外永平館。舊名碣石館。清和後易之。（清和當是統和之誤。）南即桑乾河。所謂子城者。即遼之皇城。不曰皇城而曰子城。有所避忌。亦沿唐之舊稱耳。（十國春秋。荊州高季興於天成二年築內城自固。名曰子城。）正南曰啓夏。當爲南端之



3 1764 8946 0

改稱。不然。左右掖均已改名。何獨正門不改。疑地理志之略也。內有元和殿。因知宣教之改元和。以殿故。安史叛逆。朱滔繼之。其廳堂已易名爲殿矣。

三朝北盟會編。郭藥師遣覲五臣領常勝軍五十人。雜郊民。奪迎春門入。大軍繼至。陳於憫忠寺。及戰敗。行至憫忠寺前。楊可世謂藥師。且至東門以待援。遼之八門。自東面起數。安東偏北。迎春偏南。故宋軍入自迎春。陳於憫忠寺。及其敗。且至東門以待援。所謂東門者。亦即迎春門。南面偏東曰開陽。偏西曰丹鳳。西面偏西曰顯西。爲皇城所踞依。卽爲皇城之西門。故設而不開。偏北曰清晉。北面偏西曰通天。偏東曰拱辰。依序定位。毋或紊焉。

石刻之文。有足爲參證者。唐會昌六年采師倫重藏舍利記。謂刺史竇抗於智泉寺剝木浮圖五級。安舍利於其下。卽子城東門。東百餘步。大衢之北。景福元年重藏舍利記。則云。大燕城內地東南隅有憫忠寺。門臨廣衢。是唐幽州城內確有子城。遼之皇城就子城改建。故其北門仍曰子北。憫忠寺在燕城內東南隅。而智泉則在子城東門外大衢之北。相隔匪遙。春明夢餘錄。謂尉使君寺在憫忠寺前。元一統志。大延壽寺起自元魏幽州刺史尉長命。後爲智泉寺。唐爲龍興寺。在憫忠寺之東。以石刻推之。憫忠智泉皆臨通衢。而智泉在偏北。春明夢餘錄。元一統志。皆近是而未正確也。憫忠寺在遼城東南隅。其證明已如上述。今廣安門內有南北燕角。俗訛煙閣或綫閣。卽遼城東北隅燕角樓故址。角北方讀如窠。今有地名窠上。疑燕角樓舊在其上。隅者限也。偏角之稱。而不必作盡處解。元一統志。開泰寺在昊天寺西北。書史會要。遼道宗喜作字。秦越大長公主捨藥陰坊第爲大昊天寺。帝爲書碑及額。在燕舊城。日下舊聞考謂昊天寺故基在西便門大街之北。余嘗從善果寺西北行里餘。有地名昊天台。小殿一間。中奉三大士像。壁有木雕山巖。大士垂手踞坐。儀容甚古。門有老槐。臥地斜撐。骨若鎖鈕。非近代物。善果住持還珍。謂是昊天故址。南行數十步。土岡橫蔽。前有古塔行立。數之凡八。云明築重城隔斷之。城外舊有塔也。疑爲昊天塔院。二寺皆大刹。佔地必廣。皆在北綫閣之北。又北燕角之東筆管胡同。舊有竹林寺。亦道宗時楚國大長公主捨宅建。今廢爲菜園。均足證明城之東北並未盡於燕角。然由燕角可以推度其東北。是燕角爲研究遼城最有力之證據也。東北端究抵何處。有云遠至宣武門內西單牌樓者。是宋按方三十六里之語而分計之耳。每面以九里算。當在今內城西南隅醇王府一帶。東南則在今法源寺之東。黑轆廠之

西。有遼慈智大德禪記可證。記稱葬於京東先師塋側。黑窖廠距法源寺東西相去不過里餘。遼城東壁卽在是間。又琉璃廠。清乾隆間掘地。發見遼太子左衛率李內貞墓誌。稱葬於京東燕下鄉海王村。其地距城較遠。故詳舉鄉村之名。石駙馬大街東。舊有大明濠。甚寬深。直抵城下開口。而入於護城河。清趙吉士寄園寄所寄云。京師二月淘溝。穢氣觸人。爛漫胡同尤甚。深廣各二丈。疑爲唐幽州城故濠。光緒順天府志謂其說近是。與大明濠南北相直。唐時當同爲東面之濠也。白雲觀後山有敗垣二段。係經板築。耕者掘出方石甚多。似是城之基脚。北枕小河。卽舊日城濠。西三里餘。有村曰會城門村。會城門金中都北面偏西之門。雖有改作。大抵不遠於遼之故基。余收阜成門外迤南鐵旗杆廟附近出土唐元和元年幽州大都督府錄事參軍蘄州刺史陸日暉妻王氏墓誌云。葬於蘄北歸仁鄉劉村之原。足資參證。明建重城。南面長二千四百五十四丈四尺七寸。東一千八百八十五丈一尺。西一千九百三十三丈二尺。東西皆合六里有奇。唐尺短於明鈔尺約一寸。以九里算。北面旣在白雲觀後山。則南面當不出右安門外關廟。于越王廟無考。永平館。光緒順天府志謂近南苑。涼殿與環俱盡。無跡可尋。是否納涼而建。或因涼水河得名。涼水河出右安門西南鳳泉。地名水頭莊。遼皇城西南。假定距此不遠。則西北當在羊坊店之西南。明劉侗帝京景物略云。白雲觀西南五六里。有漸太后運糧河。泯滅無聞者。當卽遼京城西南城河。在明已泯滅。今更何從而確指耶。山斯以觀。遼南京城方位四至。大概可得。其城並非南北端正。蓋東北偏西而東南偏東。或就西山來脉。取作屏展。古人城池之作。具有相度。各就山川形勢陰陽向背而定。方圓奇袤亦不一狀。足跡所經。數見不鮮。以遼城而論。於石刻亦可得證明。清康熙間西安門內發見唐貞元十五年漢陽卞氏墓誌。云權窆於幽州幽都東北五里禮賢鄉之平原。又鄭王府中國大學近年出土唐咸亨元年卞欽墓誌。云遷窆東北五里之平原。幽州故城東北偏西。故今二龍坑西安門內皆在城之東北。僉云五里。則撰文者約略之詞。要之城之東北角。在今內城西南隅。則以兩誌而可決定。至於遼城何門確在今何地。歷年逾千。四朝改作。經營耕鑿。地形變遷。豈能執一邱一壑而強名爲何基址何濠壟乎。卽明清以來撰著。其非確有可徵。亦不足引以爲據。故不備述。

唐幽州城之改遼南京。似有先兆。唐書地理志。幽州領縣九。蘄與幽都爲附郭。同在一城。隋於營州之汝羅故城置遼西郡。以處粟末靺鞨降人。唐武德元年改曰燕州。領縣三。遼西瀘河懷遠。是年省瀘河。六年自營遷於幽州城中。以首

領世襲刺史。貞觀元年。省懷遠。開元二十五年徙治幽州北桃谷山。建中二年爲朱滔所滅。廢爲幽都縣。余收大曆十四年常俊墓誌。西直門外出土。云逝於遼西縣歸化里之私第。葬於薊城北高粱河禮賢鄉之原。是燕州未滅以前。遼西仍在幽州城內。其後遼升南京。幽州有燕京之稱。而幽州之爲遼有。亦於遼西遷治。已兆其端。考訂之餘。因并及之。

金起東北。其俗樸樸。初無城郭。星散而居。國主所止曰皇帝寨。後升皇帝寨爲會寧府。稱曰上京。制度草創。自前朝門抵後朝門。盡爲往來出入之路。略無禁制。金太祖天會三年。宗望取燕山府。因遷入宮闕。於內城外築四子城。每城各三里。前後各一門。樓櫓壘。悉如遼城。每城內立倉庫。各穿複道。與內城相通。陳王兀室及韓常洛索笑其過計。忠獻王曰。百年間當以吾言爲信。海陵有志都燕。一時上書者咸言上京僻遠不便。修陳燕京形勝。天德三年。圖上燕城宮室制度。三月命尙書左丞張浩廣燕京城。營建宮室。浩與燕京留守劉峒大尹盧彥倫監護工作。旣而暑月工役多疾疫。詔發燕京五百里內醫者使治療。官給藥物。全活多者給官給賞。兩賜工役匠夫帛。貞元元年。定都燕京。以遷都詔中外。改燕京爲中都。汴爲南京。上京爲北京。中都府領節鎮三刺郡九縣四十九鎮七。改遼析津府爲大興府。治都城。浩進拜平章政事。賜金帶玉帶。宴魚藻池。經營三載。浩又明達幹練。嘗督提點繕修大內。其宏規碩畫。非遼之因陋就簡可比。光緒順天府志引亢宗奉使行程錄云。周圍二十七里。壁高四十尺。樓計九百二十座。地壘三重。此係指燕山府而言。(宋金滅遼。金以燕京來歸。改名燕山府。)即遼之舊城。觀下文城八門一語可知。志文詞節。遂成謬說。周圍二十七里。僅得遼城三面。奉使經行。得自傳聞。未足爲據。

大金國志。都城周圍凡七十五里。城門十二。每一面分三門。正門兩旁各設一門。正東曰宣曜。陽春。施仁。正西曰顯華。麗澤。彰義。正南曰豐宜。景風。端禮。正北曰通玄。會城。崇智。金史地理志。命張浩等增廣燕城。城門十三。北面多光泰一門。其他名同而次序異。參之各籍。知陽春麗澤豐宜通玄爲東西南北四正門。東之北爲施仁。南爲宣曜。西之南爲彰義。北爲顯華。南之東爲景風。西爲端禮。北之東爲崇智。西爲會城。金國經云。正門常不開。惟車駕出入餘悉由旁兩門焉。是金之中都城。初就遼城之舊。添築四子城。海陵定都。既營宮室。初擬撤子城。翟天祺曰。忠獻開國元勳。措置必有說。乃止。遂包四子城而廓之。大金國志。金國南遷錄等。叙述甚爲明白。地理志亦云增廣燕城。必

不至比遼城縮小。二十七里之說非是。已見上文。所謂內城。卽遼城之舊。而九里三十步。則金內城中宮城也。宮城之制。詳見金史地理志及大金國志。正門曰應天。舊名通天。大定五年改。內有左右翔龍門。日華月華門。左右掖門。敷德門。粹英會通承明昭慶集禧左右嘉會等門。宣明門。仁政門。東西閣門。更內爲宮殿妃嬪之所。太廟尙書省分居東西。宮城四門。南曰宣陽。北曰拱辰。東曰宣華。西曰玉華。遼之八門。除拱辰外。悉已改廢矣。

內城之外包以土城。有十二門十三門兩說。其實隨時增改。尙不止此。大金國志。大安三年十二月。以蒙古軍逼近中都。城內外亂甚。老弱奔號。大興少尹張天和奏請京師一十八門隨方便自門而出。重慶元年（重應作崇）十月十八日。蒙古軍至城下。一屯仁皇寺。一屯大安門。十一月初一日攻順陽門南順門四會門。十二月七日游騎至城下。完顏天驤遣中將金突通奔號。凡殺三千許人。去大興門。望見煙塵漲天。鼓聲震地。遂急奔回。金史逆臣傳。訖石烈執中使徒單金壽。召知大興府徒單南平。南平不知。行至廣陽門西富善坊。馬上與執中相見。執中手槍刺之墜馬。金壽斫殺之。又五行志。大安三年二月乙亥夜大風從西北來。發屋折木。吹清夷門關折。諸門是否在十八門之數。抑爲他門改名或別稱。未能確考也。

總之。金之遷都。其性質本異於遼之陪京。海陵豪縱。世宗章宗累葉承平。多所營建。遼之皇城。僅就幽州城內子城爲之。金則金碧翬飛。規模壯麗。張浩等取真定府潭園材木以建宮室。涼位十六。瑤池殿魚藻池最先成。此外春和崇慶臨芳橫翠各殿。瓊林苑同樂園瑤光樓觀會亭臺瀛柳莊杏村。多不勝舉。章宗本紀。屢有南苑西苑北苑東園西園之幸。海陵集謂燕京城內大半入宮禁。百姓絕少。其宮闕延互阡陌。上切霄漢。阿房建章。不過如是。遼代坊閭摧毀無遺。後之人欲訪求遼時基構。何可得耶。

金中都既有大城內城宮城子城之異。其方位四至宜加詳考。光緒順天府志。金之都城因遼之舊。至天德三年。東南二面各展築三里與子城相屬。其說不知何據。且下舊聞考謂天德三年展築三里。見玉堂嘉話引金蔡珪大覺寺碑。如何展築史志無稽。天德三年張浩增廣。必不僅展東南二面。既曰周圍七十五里。是每面約十八里有奇。明初大將軍徐達令指揮藥園珍計度南城（元建大都。號金舊城爲南城）周圍凡五千三百二十八丈。雖明尺較金尺爲大。亦不足七十五里。大金

國志所云或亦相傳之詞。惟北面所展無多。就會城門村定爲會城門故址可以證明。今田間尙存石塔。必金時城內古刹之物。慈光將東面言之。元趙孟頫松雪齋集程氏先塋碑云。兵部員外郎程君天錫。考諱處。仕至人匠追捕廳房總管。年八十三卒。歲庚戌。總管府君卜新塋於故燕都陽春門外三里莊。以葬祖考。戊辰新作大都。而塋城當御道。程君乃改卜於看丹造吉村之原。自曾祖而下三世皆徙葬焉。元之大都在金城北三里。其南面當在今東西長安街之北。慶壽寺海雲可庵二塔在城外可證。正南門曰麗正。程氏先塋當麗正門至南郊壇之御道。應在今永定門內大街左右。陽春爲金東面正門。以三里計之。金之大城東壁當在今虎坊橋附近。明劉定之果齋集。梁氏園外有舊城。春明夢餘錄亦謂在廢城邊。引涼水河入其中。舊有廢垣。（余於光緒二十四年初到北京。尙見殘塔。）而舟楫可泊。東面城河必在是矣。順天府志云。虎坊橋下有枯渠。直抵南下窪。乃河之南端也。惟其東南角無可確指。相傳永定門外迤西密岡子等處舊有廢垣。疑卽其處。南面有云至豐臺者。有云至南苑者。未免太夸。然今之右安門外草橋之北。其說近是。豐宜爲金南面正門。右安門俗呼南西門。昔人又呼爲豐宜門。如廣寧之呼彰義然。故老流傳。非盡無據。雖不中不遠耳。析津志。金郊天臺在京城之南五里。朱彝尊曰下舊聞謂豐臺疑卽金之拜郊臺。因門曰豐宜故曰爲豐臺。臺在城南五里。則豐宜之址可以測定。右安門外西三里菜戶營。有廣恩寺。舊爲宋燕山府清勝寺。曰下舊聞考引圖經志書謂在舊城。是卽金中都城之西南隅。西面正門曰麗澤。明一統志。百泉溪在府西十里麗澤關。地有泉十餘穴。涸而成溪。東南流入柳河村。麗澤關卽麗澤門外之關廂。今之水頭莊北。地多泉穴。疑卽百泉溪。麗澤門當在其東。白雲觀西南廣恩寺（非前廣恩寺）。遼之奉福寺。本在城外。地名栗園。金泰和中曹諱碑記謂在城內。元虞集游長春宮詩序云。長春宮卽金之天長觀太極宮。以邱長春真人居之。改名。在城內會仙坊。今之白雲觀卽其地。均可爲西面展拓之證。而金中都城之西北隅。據此可以判明。東北角相傳在今宣武門內進東板橋。舊有深溝。疑卽城濠轉角之處。地當衝要。（今和平門內絨線胡同中間。）久經興作。無從辨認。根據以上種種考證。金之大城四至。大概可知。其他各門。無事蹟可據。未能詳考。四郊壇壝。除南郊壇在豐宜門外。方丘在通玄門外。餘無可指。六十二坊之名。見元一統志。孰在內城。孰在大城。亦難分別。所知者歸義寺在今廣安門大街北。當屬時和坊。都土地廟在通玄門內今土地廟斜街。當屬奉先坊。天王寺卽今天寧

寺。當爲延慶坊。宣武門外菜市口。嘗發地得仙露寺石函。爲仙露坊。西便門大街昊天寺址。爲紫雲坊。筆管胡同舊有竹林寺。爲顯忠坊。紫雲寺故址爲北開遠坊。白雲觀爲會仙坊。餘莫可考。而歸義寺舊置遼彌陀邑建起院碑。云在宣化坊。則遼舊坊名。金時已廢矣。內城本因遼之舊。其後宮城營建。多所變更。史志闕略。而當時有關記載之書多佚而不存。來寧會同二館。所以待客者。列居東西。視遼永平之遼寧城外。恩禮有加。今右安門外西南甃子門僅存之土垣。下多遼垣瓦。當爲金內城之西壁。而甃子門不知爲當時何門之別稱。折而南鳳凰嘴以抵萬泉寺以西之土垣。爲金內城之南壁。金之內城西南轉角正當其處。故有鳳凰嘴之名。其因遼城之故基。或屬遼城西南皇城之故址。未敢臆斷。與其定爲遼城。毋寧定爲金城之較確也。鄉民毀垣取土。所得正隆大定大觀錢頗多。礪石骨骸。則蒙古軍攻城戰陣之所遺。弔古者不勝其感慨焉。宮城居內城之中。而偏於南。自豐宜門入。過龍津橋。至內城之宣陽門。再北卽宮城正南之應天門。樓高八丈。殿九重。爲數三十有六。樓閣倍之。蒙古滅金。盡成瓦礫。金史五行志。大定十三年八月丁丑。策試進士於側忠寺。夜半忽聞音樂起東塔上。而達於宮。其爲寺近宮城之證。寺木偏南。聲達於宮。宮城位置。可由此而知。所未能確考者。則內城外所築之四子城。若當四面之中。有如屏蔽。形同孤立。若於四隅分峙。互相夾輔。勢成犄角。於防守有利。觀於蒙古軍之攻內城。四子城兵皆送至。自城上擊之。於是知忠獻之設施。自合於兵法。而命京城富室遷入四子城。百官家屬入南子城。宗室保西城。戚里保北城。可知四子城素無居民。而內城悉爲宮廨所佔。官民皆散居大城。地廣人疏。非收聚不能保衛。元建大都。戶多遷徙。舊城遂淪荒寂。明嘉靖重城之築。遺址多被夷滅。四子城方位地界。遂莫由辨識矣。

前人定於金城七十五里之廣。不加詳求。多屬迷離恍惚。清震鈞天咫偶聞。自稱日走都城西南。徧搜遺蹟。而其所撰荒渺無稽。北平市政府輯刊舊都文物略。有遼金元明都城變遷圖。卽本諸震鈞。遼金都城皆作扁方影。遼大內當顯西清宮間。已屬不合。而金城大於遼城數倍。西包釣魚台東北。並今景山北海而括之。更爲悠謬。置金元一切史乘圖經於不顧而獨逞臆見。良由不知有會城門村。又誤認魚藻池爲釣魚台。不知魚藻池爲今之南河泡或蓮花池。明一統志光緒順天府志皆云在宣武門外西南。而瓊華島爲城北離宮。金史地理志記載甚明。何以疏於考闡。自來文人於遼金元三史殊少精

研。震鈞金裔。亦不詳讀金史。爲可怪也。考古之學與其他理論之學不同。固不能盡信前人之書。亦不能僅憑目驗。強古就今。妄爲武斷。必須互相參合。慎於取舍。運以精思。纔晰條分。瞭然不紊。知之爲知。不知爲不知。方足信今傳後。有裨史學。吁。其難哉。

114
10
1095.31
3